

rieure, de petites filles fi attentives à reciter leurs chappellets, que leurs compagnes les venans appeller pour aller iouïr, ou pour retourner à la maison, elles ne partoient point de la Chappelle qu'elles ne les euffēt acheués. Souuent ces petites ames nous viennent [98] dire; Ma Mere, faites nous repeter ce que les Peres nous ont enseigné au Catechisme, afin que nous sçachions bien nostre leçon. C'est affés pour cét article, difons deux mots de la simplicité & de la candeur de ces bonnes gens. Quand quelqu'un d'eux s'est bien trouué d'une medecine, tous les autres malades en demandent une semblable, quoy que leur maladie soit bien differente: Une bonne femme s'estant venuë rendre à l'Hospital, avec deux de ses enfans, dont l'un se portoit mal; on ordonna deux medecines, l'une pour l'enfant, & l'autre pour la mere; le matin on presenta les deux gobelets à la mere: Or comme c'est la coustume parmy eux, de se faire part les uns aux autres de ce qu'ils boient, ou de ce qu'ils mangent; cette bonne creature prend en main la medecine de sa fille, elle y gouste la premiere, puis elle en donne à boire à ses deux enfans l'un apres l'autre; ayant vuïdé le premier gobelet, elle prend le second, & le distribuë à la mesme façon, chacun y beuant à son tour; voila une bonne façon de prendre medecine.

Madame la Duchesse d'Aiguillon aiant [99] enuoyé en la Chappelle de son Hospital un beau Crucifix, où d'un costé est la sainte Vierge, qui presente à nostre Seigneur cette bonne Dame; & de l'autre Saint Iean, qui presente Monseigneur le Cardinal, & de petits Sauvages peints tout à l'entour: Ces bonnes gens, notamment les femmes & les filles, accouroient pour voir ce Tableau viuant. Or comme les Meres leur